

PROPOSICIÓN SOBRE O DESENVOLVEMENTO DE MEDIDAS DE ACCESIBILIDADE NA CIDADE CONFORME AO SEGUNDO ESTUDO REALIZADO POLA ACEM

O Grupo Municipal do Partido Popular, ao abeiro do Regulamento Orgánico Municipal, presenta, para a súa inclusión no Pleno, a seguinte **PROPOSICIÓN**:

EXPOSICIÓN DE MOTIVOS

A accesibilidade universal debe ser concibida como un compromiso e unha responsabilidade de toda a cidadanía, das institucións públicas a todos os niveis, dos colectivos sociais e tamén das empresas públicas e privadas.


Para acadar unha sociedade cada paso máis inclusiva e accesible é preciso que todas as administracións traballen desde o seu ámbito, dunha forma coordinada, para cumprir cos obxectivos marcados pola Lei Xeral de Dereitos das persoas con discapacidade, que se aprobou no ano 2013 e que sitúa a España como un referente nesta materia, tal e como o ten recoñecido a Organización das Nacións Unidas que lle concedeu ao noso país hai máis de catro anos o Premio Roosevelt, en atención ao tratamento das persoas e aos avances nas políticas de inclusión do Estado español. Ese recoñecemento, lonxe de acomodarnos no feito en cada un dos ámbitos, debe ser un referente para animar o longo traxecto que aínda queda por percorrer neste terreo.

Porque, non cabe dúbida que un cambio do calado que se pretende na nosa sociedade, necesita a coordinación e a axuda de todas as administracións, tendo en conta que a accesibilidade non é unicamente unha acción normativa, que tamén o é, senón sobre todo unha acción de cambio social. Ese é o motivo polo que todos os poderes públicos deben seguir traballando coas institucións e as entidades do terceiro sector para alcanzar unha sociedade accesible universalmente.

A nivel do Estado estase a traballar en varias fronteas a través do Centro Español de Documentación sobre Discapacidade, desde o Centro Español de Tecnoloxías da Accesibilidade, a través de encargos a entidades relacionadas coa accesibilidade -como a Fundación ONCE- e, de forma moi especial coa elaboración do segundo Plan Nacional de Accesibilidade, cumprindo co establecido pola citada lei xeral. Un Plan que precisa, para o seu desenvolvemento, do traballo conxunto e dos recursos das comunidades autónomas, corporacións locais, empresas públicas e privadas e do Goberno de España.

En Galicia, entre as medidas impulsadas no ámbito autonómico, contamos desde finais de 2014 cunha específica Lei de Accesibilidade, un texto integrador para unificar, coordinar e establecer os criterios de aplicación, execución e control nas actuacións que realizan, tanto a administración autonómica como a local.

A nivel municipal, Concello e entidades sociais de Santiago levan anos traballando nesta materia, como o demostra a concesión en 2006 do Premio Reina Sofía de accesibilidade. No pasado mandato, levouse a cabo a elaboración dun proxecto en colaboración con COGAMI para a execución dunha primeira fase de obras de mellora de accesibilidade; e durante o actual mandato, a Corporación municipal tamén vén dando mostras desa vontade de contribuír a mellorar as condicións de accesibilidade, acordando por unanimidade a realización de distintas accións nesa dirección, aínda que unha gran maioría delas – incluíndo a convocatoria da Comisión de Accesibilidade- seguen á espera da súa realización.



Un dos últimos acordos no seo da Corporación produciuse en xullo do ano pasado cando se decidiu por unanimidade que o Goberno municipal estudara o traballo realizado por Julio Louro, responsable da área de mobilidade da Asociación Compostelá de Esclerose Múltiple (ACEM) e, conforme ás prioridades establecidas naquel documento, se executaran as obras máis prioritarias en 13 puntos da cidade, para facer de Santiago un exemplo de cidade accesible e universal. Polo que puidemos saber unha parte daquelas actuacións foron abordadas, pero quedan aínda por acometer varias actuacións puntuais que foron obxecto dun segundo estudo por parte de ACEM.

Co mesmo espírito de colaboración e coas mesmas doses de realismo que no estudo de 2016, a ACEM achégalle ao Concello un novo traballo, datado en setembro de 2017, cunha serie de accións necesarias para a supresión de barreiras arquitectónicas no tecido urbano. No documento sinálanse un total de 31 ámbitos, entre eles algúns -como o acceso ás piscinas do Sar, as rúas do Valiño e das Fontiñas (Avenida do Camiño Francés) ou o contorno do CHUS- xa recollidos no estudo anterior.

Tendo en conta, tal e como se sinala no propio traballo de ACEM, que do que se trata é de procurar a accesibilidade por riba de consideración estéticas que poderían conlevar elevados custos, tendo en conta que se trata de actuacións asumibles economicamente e con inmediatos beneficios sociais para un importante colectivo que as necesita, presentamos á consideración do Pleno a adopción do seguinte

ACORDO


O Pleno do Concello de Santiago de Compostela insta ao correspondente órgano do Goberno a que:

1.- Tome en consideración a segunda parte do Estudo para a supresión de barreiras arquitectónicas realizado pola Asociación Compostelá de Esclerose Múltiple (ACEM) e proceda a realizar as melloras na accesibilidade que nel se solicitan.

2.- Solicite a colaboración da Xunta de Galicia naquelas actuacións que lle correspondan a esta e/ou naquelas que compartan ámbito competencial.

3.- Proceda a convocar a Comisión municipal de Accesibilidade de forma sistemática, tal e como se acordara no acordo plenario unánime adoptado en novembro de 2015.

Santiago de Compostela, a 4 de maio de 2018


Agustín Hernández
Portavoz do Grupo Municipal Popular

- Sr. Alcalde do Concello de Santiago de Compostela